

(<https://news.usm.my>)

Berita Mutakhir

16  
MAY

# HARGAI SUMBANGAN GURU SEBAGAI PENDIDIK ANAK BANGSA



USM, PULAU PINANG, 16 Mei 2018 – Guru, cikgu, ustazah, pensyarah atau apa gelaran sekalipun, mereka inilah guru yang bertungkus lumus menjalankan tanggungjawab untuk mendidik anak-anak bangsa kita supaya terus mendapat ilmu pengetahuan sama ada ilmu aqli atau naqli.

Setiap dari kita pasti akan ada nama guru-guru yang bermain di fikiran setiap kali tibanya tarikh keramat 16 Mei saban tahun kerana seluruh negara meraikan guru-guru bersempena dengan 'Hari Guru' di Malaysia.

Menurut Dekan Pusat Pengajian Ilmu Pendidikan, Universiti Sains Malaysia (USM), Profesor Dr. Hairul Nizam Ismail, para pendidik adalah insan yang banyak berjasa mengorbankan diri, masa, harta benda, keringat dan perhatian mereka demi kemenangan para pelajar.

"Kami para pendidik menyanjung dan meyakini profesion ini sebagai satu peluang untuk membentuk pelajar dari segi akademik mahupun dalam aspek sahsiah, nilai dan keperibadian," tambah Hairul Nizam.

"Kejayaan pelajar adalah kepuasan dan kebanggaan para pendidik. Memang tidak dapat dinafikan besarnya pengorbanan seorang pendidik dalam mendidik anak pelajarinya menjadi orang yang berguna kepada diri, masyarakat, agama dan negara.

"Kadang-kadang mereka mendidik anak-anak pelajar sehingga ada yang tidak sempat meluangkan masa untuk anak-anak mereka sendiri. Namun, apa yang dipentingkan oleh para pendidik tersebut ialah keikhlasan dalam pengorbanan mereka itu. Insyaallah, Tuhan pasti akan membalas dengan ganjaran setimpal, sama ada di dunia mahupun di akhirat kelak," tambah Hairul Nizam.

Sambutan hari guru ini sangat signifikan walaupun diraikan dalam suasana dan kemeriahan yang sederhana ianya adalah sebagai tanda penghargaan para pelajar atau murid kepada para guru mahupun antara rakan-rakan guru di antara satu sama lain.

"Guru ibarat lilin yang membakar diri bagi menerangi yang lain" adalah pepatah yang sering digunakan bagi menggambarkan penat jerih para guru dalam mendidik serta berusaha dalam memberikan ilmu yang terbaik kepada para pelajar.

Tema sambutan Hari Guru bagi tahun ini ialah Guru Pemacu Transformasi Pendidikan yang bermaksud guru ialah agen penting dalam merealisasikan transformasi melalui peringkat akar umbi pendidikan dalam menjayakan Pelan Pembangunan Pendidikan Malaysia (PPPM) 2013-2025.

**Selamat Hari Guru kepada semua pendidik terutamanya warga pendidik dan akademia di USM dan teruskan menabur benih kepada anak muda pemimpin masa hadapan.**

Teks: Nor Rafizah Md. Zain



Share This

**Pusat Media dan Perhubungan Awam / Media and Public Relations Centre**

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : [pro@usm.my](mailto:pro@usm.my) (<mailto:pro@usm.my>).

Laman Web Rasmi / Official Website : [Universiti Sains Malaysia](http://www.usm.my) (<http://www.usm.my>).

[Client Feedback / Comments](http://web.usm.my/smbp/maklumbalas.asp) (<http://web.usm.my/smbp/maklumbalas.asp>) | USM News Portal. Hakcipta Terpelihara USM 2015